

Senza anr nagina «La Quotidiana»


Agentura da novitads rumantscha anr: 15 onns en servetsch da la pressa rumantscha

■ **(anr) L'Agentura da novitads rumantscha (anr) cumplenescha 15 onns d'activad cun success. Dapi il cumenzament da sia lavur il schaner 1997 èn ils servetschs da l'agentura elements impurtants per il mantegniment e la promoziun da la lingua rumantscha.** L'Agentura da novitads rumantscha è vegnida fundada il zercladur 1996 ed ha cumenzà sia lavur operativa il schaner 1997 cun la publicaziun da l'emprim numer da la gasetta da mintga di «La Quotidiana». L'agentura da novitads ha la mira da sustegnair ils meds da massa rumantschs – en emprima lingia la pressa. L'agentura è independenta da ses clients e vegn finanziada cun contribuziuns chantunalas e federalas.

L'anr furnischa als meds stampads La Quotidiana, «La Pagina da Surmeir» e la «Posta Ladina» sco er als meds d'infurmaziun electronics mintga di texts e fotografias. Questas contribuziuns vegnan scrittas tant en tut ils idioms rumantschs sco er en rumantsch grischun. Ils idioms vegnan utilisads per novitads localas e regiunalas, la lingua da scrittira vegn resguardada, sche la contribuziun è d'interess per l'entira cuminanza rumantscha.

Senza anr nagina «La Quotidiana»

Cun sia gronda purschida è l'anr s'establida sco ina posa impurtanta dals meds da massa rumantschs, surtut dals meds stampads. Senza las prestaziuns da l'agentura da novitads da lingua rumantscha na fiss la publicaziun da «La Quotidiana» en sia furma odierna betg pus-



Il parsura da la anr Jon Domenic Parolini (san), en discurs cun il manader operativ da la anr Guido Jörg.

saivla. Dapi la sorprendida da collavurators redacziunals da «La Quotidiana» il matg 2009 segirescha l'anr per la cumparsa quotidiana da la gasetta.

Er ils ulteriurs dus products stampads rumantschs «Posta Ladina» e «Pagina da

Surmeir» fissan senza il sustegn da l'anr fermamain periclitads. Perquai èn ils servetschs da l'agentura da novitads senza dubi ina da las mesiras las pli impurtantas ed effizientas per il mantegniment e la promoziun da la lingua rumantscha.

Grazia a sias structuradas po l'anr accumplir en moda efficazia ed individuala ils giavischs dals clients dals meds stampads; era stattan las prestaziuns actualas da l'anr en ina fitg buna relaziun dals custs e dal gudogn.

Cussegl da fundaziun da l'anr

Ils purtaders da l'anr èn reunids en in cussegl da fundaziun, il qual vegn presidià da *Jon Domenic Parolini* da Scuol. Mintgamai in sez en il cussegl da fundaziun han ils editurs dals meds stampads rumantschs («La Quotidiana», «La Pagina da Surmeir» e «Posta Ladina»), ils purschiders da Radio e Televisiun Rumantscha (RTR, «Radio Grischina» e «Radio Engiadina»), las organizaziuns Lia Rumantscha e Pro Svizra Rumantscha sco er il Departament d'educaziun, cultura e protecziun da l'ambient dal chantun Grischun.

Purtada vegn l'anr dal maun public. Il budget annual per l'import da radund 1 miu. francs vegn finanzià per in terz dal chantun Grischun e per dus terzs da la confederaziun. Da quest budget van davent mintg'onn 100 000 francs sco pajaments directs a la «Pagina da Surmeir».

Collavurators stabels e collavurators libers

Operativmain vegn l'anr manada da *Guido Jörg*. L'agentura da novitads occupa indesch collavuraturas e collavurators cun in volumen da 780 perschient da plazzas da lavur. Ultra da quai èn diversas collavuraturas e divers collavurators libers en Surselva, Val Schons, Engiadina sco era giu la Bassa activs per l'anr. Posts da lavur sa chattan en la redacziun centrala a Cuir sco er a Mustér, Cumpadials, Trun, Vuorz, Sur, Zernez, Scuol, Uznach e Berna.